

四庫全書

集部

欽定四庫全書

明文海卷一百二十三

餘姚黃宗義編

贊一

溟滓生贊

有序宋濂

溟滓生者盱江廖應淮海學也抱負竒氣好研摩運世推移及方技諸家學年三十游杭上疏言丁大全誤國狀大全怒中以法配漢陽軍生荷校行歌出都門道傍觀者嘖嘖壯之抵漢江濱遇蜀道士杜可大

揖曰子非廖應淮耶生鄂然曰道士何自知之可大  
曰宇宙大虛一塵爾人生其間為塵幾何是茫茫者  
尚了然心目間矧吾子耶然自邵堯夫以先天學授  
王豫天悅天悅死無所授同墓玉枕中未百年而吳  
曦叛盜發其冢得皇極經世體要一篇內外觀象數  
十篇余賄盜得之今餘五十年數當授子吾俟子亦  
久矣乃言於上官脫其籍盡教以冢中書其算繇聲  
音起生神鑒穎利可大指畫未到者生已先意逆悟

可大自以為不及學既成去隱宣歙間遇余安裕弋  
陽將教之安裕勸生業中庸生矐目厲聲曰俗儒幾  
辱吾康節於地下矣復去之杭客賀外史家畫市犬  
行數夜沽酒痛飲飲即吐吐即飲不醉如泥弗休醉  
中嘗大叫曰天非宋天地非宋地奈何奈何語聞賈  
似道遣客叩之生曰無多言浙水西地髮白時是其  
祥也似道未解復召至屏人與語生曰明公宜自愛  
不久宋鼎移矣似道惡其言掩耳走走生亦徑出過魯

淵子家索酒轟飲酒酣作嬰兒啼曰大厦將焚燕猶  
呢喃未已耶復賦歌以見意都人士聞之競指以為  
恠民不與接獨太學生熊晞聖猶時造其廬生死執  
熊手謂曰吾端居曾樓聞空中戎馬百萬來人鬼作  
哭泣聲壬申襄樊陷甲戌宮車晏駕乙亥長江飛渡  
似道亦殛死臨漳丙子三宮播遷諸王大臣皆南北  
亂走噓吸事耳子不去欲何為居亡何宋事日非沿  
江州郡望風奔潰生大慟曰殺氣又入閩廣中吾不

知死所矣遂遁去其言無一不驗後四年病死處州  
學中年五十二無子惟一義女從之生宗堯夫先天  
之學頗自謂知易每見諸易師傳疏不問淺深輒訕  
駁以為樂及論後天則尊羲畫為經彖爻繫辭為傳  
黜文言彖象二傳為九師之言且謂說卦非聖筆必  
不能作上下繫乃門人所述序卦直漢儒記爾蓋生  
聰明絕人未聞道而驟語數故其論經多失中然性  
使酒難近又好訐人陰私人面頸發赤不顧罕有從

其學者唯國子簿吳浚進士彭復學師之浚不卒業復屢受唾斥不怨生將遁時召復至口發例手布籌雖平昔所靳若終身不示人者一舉授復復後又授鄱陽傅立云或曰生瀕死語女曰吾死後一月中朝命山姓烏名使者來徵吾及傅立立當過予門汝可出藏書示之立當以此致大官後皆如其言所謂山姓烏名崔鵬飛也生所著書有玄玄集歷髓星野指南象喻統會聲譜畫前妙用數十萬言今猶聞傳於世贊曰

龍圖成章有文從衡以濬以明以洩其藏以奠乎玄黃  
昔我素王韋編三絕墜緒微茫誰其我綴我叅我腴九  
師襄之我苞我晶百代攘之如河之渾如曠而昏如治  
絲以棼天未降割一髮攸存維洛有士居於百原超神  
冲漠凝於畫先數往知來小大斯甄莫峻匪厓我陟其  
顛莫深匪淵我淪其泉簡材以昇非隱弗傳有冥者冢  
卒昭以宣或得其摘載神於言炎炎宋錄維其訖矣長  
星蝕柳色之赤矣青祥見徵土髮刼矣明昏以世莫之



戚矣魚在在鬻尚其息矣維生之知中如沸羹彼惛弗  
知覆謂我狂我狂如何我憂孔多我山我河我用弗磨  
俾淪胥以訛我酒既嘉我瑟又蘇我寧不嘯歌北風其  
涼旂旐央央我車龐龐蕩蕩江流杭之如陸有腥其穢  
流血沃沃海氛方殷其何能目人有恒言風雨漂搖夏  
宇障之涉於大川烝徒楫之楫副宇橈子子馬依國武  
斯墜不知攸戒日隕弗升雖晝作夜號舞於林鬼瞰於  
舍孰投是艱曾莫之艾乃怒乃驚乃瞻乃行乃遯死於

冥睠生之為胡乃神以著徵之古聖匪程伊度何以言之卒淪於數一曲之淹不通其故易道既泯數亦不類激贊於生發我長喟月出皎兮在天之心在天之心何古何今

筮竹贊

有序唐肅

予子之漳欲筮而無著請以竹代之予曰易謂聖人之德幽贊神明而生著則著固靈矣然地無著可廢筮乎屈原離騷云索瓊茅以筮筮漢方技傳亦有筮筮須臾孤

虛之術說者曰筵竹筭也楚人以結草析竹卜為筭然則楚人之筵筭以無著歟夫著蔡產也大龜可卜者出於蔡上有著百莖下必有靈龜守之蔡非楚地故以筵代著而卜焉今越去蔡尤遠著或不能致則放筵筭之法無害况吾所以質諸神者在誠不在物之潭既作之因為贊俾刻其積云

辭曰祝蜥蜴以祈雨龍之同類也禁原蠶以助牧馬之同氣也繫竹之視著均少彙也虛中弗室又圓其外也

虛則靈具乎智也著百莖而同本合萬殊為一致也以  
有代無理或弗悖也爰輻爰積受命則出也載營載盡  
吉凶以示也於戲泰筮神明之攸寄也曷竹曷著惟秉  
誠之無貳也

義鶴贊

有序高啟

吳報恩寺浮屠之顛有二鶴巢焉以遊以宿出返必  
俱一日其雄星脰輪索中奮翼自擲空懸弗脫雌下首  
大鳴若籲於人衆憐之莫能升遂宛轉而絕雌依其傍

弗去羣鳥欲磔之輒引喙怒逐不使近逮毛骨盡化  
乃已余居值寺東嘗見其彷徨飛旋形貌慘悴風雨  
之夕哀唳嗷嗷若號慕然余念夫世固有伉儷相悅者  
矣一旦失所天哀未改而已他適塗膏自媒惟恐非艾  
晨眺夕唳曾無含忸世嘗以禽喻惡人寧不辱是鶴哉  
迺贊曰

嗟爾鶴乎維鳥之特猗雄死自守禦鳥之賊猗獨棲於  
標夜失其匹猗哀嘶返顧不啄而食猗厥質始化豈貞

之魂猗匪魯黃鵠孰配爾德猗

象山先生贊

趙沅

儒者曰其學似禪佛者曰我法無是超然獨契本心以俟聖人百世

黃氏三壽圖贊

有序方孝孺

余少聞近古致治之主惟漢之文帝最賢求其本紀所載殊無甚異之事而太史遷獨稱其時老年六七十翁未識至城市游遨嬉戲如小兒狀以為極盛心嘗疑之謂

此何足見其盛乎後遊四方海內經大亂之餘風俗益  
偷垂髻之童輒往來郡邑用智巧相欺給然後慨然思  
文帝之時信不可及追惟其盛未嘗不歎其難遇也間  
竊自解以為唐虞三代固未易及至若文帝仁厚之主  
有志於治者皆可庶幾效之安知不復遇乎昔年遊婺  
聞浦陽黃氏兄弟三人者合食以居至老不出閭巷心  
甚慕之今年至其家三老人者出迎鬚髯頰白冠裳如  
畫行步踈踈可數默然若不能為辭余私念史遷之所

稱者其謂是乎天下自此殆將治矣治亂之來雖由於天而實係乎俗便捷巧佞之俗成其流必至於亂忠厚朴愿之俗成治之漸也當文帝時漢興三十載矣故其俗之盛如此今國朝之興方一紀而東南遠邑之間已有若三老人者使越一世之後安知不如遷之所稱乎然則三老人者君子於其身觀國俗焉所繫豈小哉其鄉之好事者繪而為圖而請余贊贊之固宜也雖然使天下之人皆若三老人者余之志伊周之志於是而見



也謂三老人為異而贊之者非余之志也贊曰

俗之澆淳視乎斯民治亂之原非天伊人世之方亂民  
喪厥德詐譖機巧胥援以溺維治之符俗厚人龐厥風  
既成邦國以昌元亂既弭殆臻於理曷占其瑞視諸黃  
氏維黃世族為婺望家爵位非崇其德孔華恃德而驕  
德則日隳弗居其名福祿攸躋懿茲黃氏有伯有季既  
錫之富又賚之齒人豈不富僅以貲名孰能與夷咸以  
善稱人之者艾集於一身疇得乎天施及弟昆伯氏持

觴維仲之授季也夔夔以穀以豆其服豈華斯帛斯絺  
食非云珍於以療飢孰不能言我弗出口一其誠敬樂  
有壽者凡爾子孫曷不是程以革其漓以揚休聲豈惟  
爾家宜俗之導孰能旌之四方是效

程文憲公雪樓先生畫像贊

并序胡儼

儼嘗聞諸先生長者言初勉齋黃公為新建丞與弘齋  
李氏講學於東湖書院極論性命道德之旨時雙峯  
饒氏從弘齋實與有聞焉黃李二公皆朱子門人而饒

氏親承二公故學有本源傳饒氏之學者徽庵程先生  
得徽庵之傳者程文憲公雪樓先生吳文正公草廬先  
生二人也雪樓於徽庵為從孫草廬亦雪樓之薦起  
也後人徒知雪樓遭逢世運文章事業烜赫當時  
而不知其理學淵源實與草廬同一揆也公之玄孫今  
吏部郎中翰林侍書南雲持公遺像見示儼獲拜觀乃  
述贊曰

天生人豪英偉特達義理精微源泉浚發學得其宗乘

時遭逢論思密勿廟堂雍容掌帝之制渾噩古風金薤  
琳琅焜耀無窮登薦遺逸名德式崇懸車引年進退以  
禮其心休休豈曰知止幅巾短褐逍遙夷猶麻源之谷  
實邃且幽流瀑涓涓白雲悠悠午橋綠野令德作述九  
原不起吾孰與游

平心杯贊

劉定之

陶甃為杯有童中立斟之以酒浸趾沒膝滙腰平心不  
可復益益則下漏淋漓滴瀝至於枯乾衣履盡濕童僕竊

笑賓主失色維昔哲匠用戒貪得豈維酒哉可該凡百

郭令公像贊

失名

唐尚父太尉中書令汾陽王姓郭氏其元勲偉烈著於社稷豈獨其身為國宗臣而垂裕子孫百世賴之余從其裔孫獲觀遺像乃知將相自有真也韓退之所謂如高山鉅谷龍虎變化蓋其麾下偏裨頤指氣使者尚然而况於王乎為作贊曰

唐室中微主昏臣僭長驅腥膻摧裂宇縣青驃蜀道龍

種路隅嗣皇朔野號令丞徒風飛雷厲英雄羣集孰若汾  
陽其聲赫奕躬扶日馭手揮天戈光弼懷恩左翼右呵  
蕩滌咸維勦滅安史盡挈寰海歸唐天子歷肅代德常  
為虎臣功名蓋代貴富超倫入於其家綺疏朱戶侯伯  
僕隸妃主女婦立於其朝真王上公強藩屈膝奸相斂  
容出於其郊貝冑金鉞回紇羅拜吐蕃奔北唯茲汾陽  
何福之隆本於厥心全德大忠厥心何見其儀孔碩河  
目海口泰華屹立宜爾儉壬匍匐超超鬼貌藍色狐遇

於菟十世宥之尚百其世凜乎猶生遐哉勿替

文丞相像贊

孫燧

偉哉文公千古之士方國脉尚存也流離顛沛唯恐不  
得其生及國脉既絕也慷慨從容唯恐不得其死求生  
匪生求死匪死生唯求成就一是丈夫事業固每如  
此百世聞風孰不興起

震川先生贊

有序王世貞

故太僕寺丞直文淵制敕歸震川先生諱有光字應甫

崑山人也生而美風儀性淵沈於書無所不讀而尤邃  
經術長於制科之業自其為諸生則已有名及門之屢  
恒滿而先生方以久次膺貢尋舉應天省試第二人故  
相張文毅公治時主試得先主文而竒之大以國士相  
許然至公車輒報罷行年六十而始登第又不得館選  
出令湖之長興踰三載僅遷判順德府高新鄭其座主  
也以大相秉銓憐先生屈拔為太僕丞尋以太僕入司  
制勅氣稍發舒而浙之臺使復苛擿之先生方屬疾鬱



辭不樂遂卒先生於古文辭雖出之自史漢而大較折衷於昌黎廬陵當其所得意沛如也不事雕飾而自有風味超然當名家矣其晚達而終不得意尤為識者所惜云

贊曰風行水上渙為文章當其風止與水相忘剪綴帖括藻粉鋪張江左以還極於陳梁千載有公文運斯昌衰起八代如韓在唐宗工哲匠宋之歐陽余豈異趣久而始傷

國寶新編傳贊

并序顧璘

李夢陽字獻吉本關中人從父官遂寓大梁仕至江西按察副使朗暢玉立傲晚當世初讀書斷自漢魏以上聞人論古昔有不解事即曰豈六代以還書耶蓋不之讀故其詩文卓爾不羣晚始汎覽諸家益濟弘博或失則粗抑矯枉之偏不得不然耳夙尚氣節當孝宗朝上書言事意翕翕希賈生代韓司徒草奏劾諸閹危矣賴武功康子海脫其難視江西學政文

教鬱興不能與俗俯仰躬陷縲紲誠亦負氣之過卒  
使譏毀叢積擯棄終身伊誰咎哉空同集六十三卷  
可謂富矣姑蘇黃省曾詮次至以辯獄等辭亦錯其  
間詆之耳贊曰

黃初響絕詩道中微唐興二傑大發厥機世豈不遠知  
繼者希桓桓李君生也實後上泝風雅志貯多有一鳴  
驚人千古為友

何景明字仲默信陽人仕至陝西按察副使少有神

解弱冠入京身不勝衣馳才長賦便凌作者時海陵  
儲公囀錫山邵公寶領袖文苑咸加賞歎和粹冲夷  
人樂為友撓之不濁澄之不清衆目為台輔中人然  
性簡意寬不善事樞要遂出為校文之職以勞致瘁  
弗臻大成咎在政人不在其身也夫文章之道初慎  
師承乃能立體馴臻妙境始自成家觀其與李氏論  
文宜取舍筏登岸為優斯將盡棄法程專崇質性苟  
為己地固非確論賦咏著述互見短長自古恒然匪

徒今日若乃天才騰逸咳唾成珠寶亦人倫之雋乎  
贊曰

辭尚體要矩矱式陳異稟拔萃乃貫天人立訓範世俾  
也可循穆穆何君學緣宿解源出自山委折歸澥既濟  
視筏弗舍胡待

祝允明字希哲蘇州人仕至應天道判超穎絕人讀  
書過目成誦鉅細精粗咸貯腹笥有觸斯應不事猥  
鄙學務師古吐辭命意迥絕俗界效齊梁月露之體

高者凌徐庾下亦不失皮陸玩世自放憚近禮法之  
儒故貴仕罕知其蘊真州蔣山卿嘗見所撰建康觀  
雲記吐舌下之曰文不在茲乎偏才曲學真河伯未  
離龍門難與言水也余特賞其知言書學精工自急  
就以逮虞趙上下數千年變體固不得其結構若義  
獻真行懷素狂草尤臻筆妙本朝書品不知合置誰  
左贊曰

漢隱方朔明玩祝子傲晚冠紳游戲文史蓄之海滙發

也雲蒸騰踏藝苑孰敢爾陵

徐禎卿字昌穀蘇州人仕至國子博士神清履弱雙  
瞳燭人幼精文理不繇教迪著交誠感暮賦諸篇詞  
旨沉鬱遂闖晉宋之藩凌躡曹魏長宿驚歎稱為文  
雄筮仕武宗朝厭司法比請移學職斯亦可窺其雅  
識矣專門詩學究訂體裁上探騷雅下括高岑融會  
折衷備茲文質取充棟之草刪存百一冀成一家之  
言傳茲來世至今海內奉如珪璧所謂雖多亦奚以

為也其所研索具在談藝錄中可謂良工獨苦者與

交誠感暮賦  
迪功集不載贊曰

博士清資冰淵斯濯遺編熒熒鳳羽鱗角唯寶貴奇匪  
以其多有人弗粹山委則那

朱應登字升之寶應人仕至雲南叅政孝友性成篤  
厚人理愷悌無基刊夷町畦故能善下仁賢兼容謏  
劣綽弘大賢之度職錢穀則政理飭教化則才興斯  
忠信基之矣特詞章彪發泉涌錦燦或當人落筆一



掃千言旁觀者往往奪氣萋斐伊興此唯芽孽然高舉  
闕視渺然不為意也及其拂袖歸田益窮詞與以彼易  
此又豈媚嫉所能知乎今觀其文賦叙綴瞻麗森張武  
庫殆且伯仲潘陸奴僕元白有餘地矣羽儀斯世其茲  
數人也夫贊曰

仁哉叅政不遺其親異類廣含矧我同人天授藻心讒  
夫側目白璧永輝蠅罪何贖

趙鶴字叔鳴江都人仕至山東按察副使文性淵奧

吏道精覈主覆戶曹屢籌大計督學山東誓清膠庠  
其甚乃舉郡邑弟子十六汰之士始汹汹弗任母亦  
矯枉過其正乎詩耻凡語於古愛謝靈運於唐愛孟  
郊於元愛劉因嘗曰此道不宜淺淺則庸茸下矣善  
乎巖滄浪有言劖人宜取心肝喻於立命處殫力耳  
毛膚焉足試乎後登泰山金焦諸篇言自作更不隨  
人真凌駕千古膽也晚註五經考論歷代史刊正先  
誤自信彌篤或者以爵位駭按察不知正腐鼠等烏

能驚動之哉贊曰

文尚已出襲乃稱賊江都奮精羣譟靡惑言曰法後政  
曰正邦志所嚮往迅霄長江

鄭善夫字繼之福州人仕至南京驗封郎中氣秀巖  
谷發情聲詩雖才韻弗充而古色精言高映霞表飄  
飄然有逍遙遠舉之志好遊名山嘗入武夷雁蕩峻  
陟冥搜都忘內顧養疴自遠逡巡郎曹樂負高標殆  
輕人爵時與衢州方豪同好意泊如矣嘗與予期曰

明年海上有紫氣東來是吾觀化至矣赴官留省中道  
奄殂吁亦竒怪也哉贊曰

靈運樂游嵇康慕仙超矣驗封千載同然南海孕靈陽  
春呈響鵠性鴻情永遺遐想

都穆字玄敬蘇州人仕至太僕少卿清修博學網羅舊  
聞考訂疑義多所著述好遊山水雖居官曹奉使命有  
間即臨賞名勝騁其素懷所得必撰一記輯成巨帙又  
廣錄古今金石遺文為金薤琳琅集齋居蕭然樂奉賓

客啣栝道古以永終日不植生產或至屢空輒笑曰天地之間當不令都生餒死日晏如也文簡古有法詩雖孤子沖泊竟非俗韻贊曰

詞士撫華技陋雕蟲雅儒慕古力紹揚雄懸磬非貧玄酒非薄自顧充然疇測其樂

景暘字伯時流寓南京本儀真人仕至太子中允事母至孝目盲數歲復明昆弟不遠故舊不遺人歸其德厚矣夷曠有度無競無傲仕既融達好學無怠法

左馬遷為文不尚鈎棘字順語圓具有繩準詩主盛  
唐蕭散遺俗庶幾高卧北窓之懷體固所緩言矣余  
器重其人每言必正三事乃弗陟五階而逝其命也夫  
善書初工真行後師周伯琦小篆頗得風骨贊曰

文以體正詩以興竒昧者志怪乃蹈支離中允端士德  
厚氣直詞鋒沛發靡不中的

王韋字欽佩南京人仕至太僕少卿孝德純修喪母  
毀瘠卒父徹憲宗朝給事中直諫有聲少卿承志執

節屹有稜範歷仕留署匪云要樞確明職司金石不撓  
不曰孝思維則者乎論詩專尚才情其言曰唐風既成  
詩自為格不與雅頌同趣漢魏變於雅頌唐體沿於國  
風雅言多盡風辭則微今以雅文為近詩未嘗不流於  
宋也故其詩婉麗多致雋味難窮或者謂為纖弱豈知  
所操之殊向哉贊曰

王子維介明辨義利千金可捐一諾無替詞流別代力  
紹唐風涵情獨遠執象奚工

唐寅字子畏一字伯虎蘇州人舉應天鄉試第一坐  
事廢坦夷疎曠冥契禪理弱冠居庠序漫負狂名著廣  
志賦暨連珠數十首跌宕融暢傾動羣儕青黟倪公  
見之亟稱才子以故翰苑先輩爭相引援驕妬互會  
竟媒禍孽棄落之餘益任放誕邪思過念絕而不萌  
託興歌謠狗情體物務諧俚耳因避俳文雖作者不  
尚其詞君子可以觀其度矣今司馬表表所刻僅僅  
數篇則其絕詣也贊曰



嗟嗟伯虎孰廣爾志登臺則流牖下斯滯生滅既一寵辱奚驚上善如水是生令名

孫一元字太初不知何許人自云關中長寓吳越間卒於湖州風儀秀朗蹤跡竒譎玄巾白袷混遊貴賤常以鉄笛鶴瓢自隨遇所會心輒一傾倒蓋隱淪之高逸性好吟詩初談導引人疑其仙晚嬰婚娶入司空劉公湖南雅社援進儒術皆非其本色也詩詞極其苦心所乏天才耳贊曰

宦達無私愧彼塵鞅山澗考槃乃嘉高尚龍笛吟風鶴瓢  
酌月皎皎太初江湖之傑

王寵字履吉蘇州人貢入太學卒清夷恬曠與物無競  
人擬之黃叔度尊官宿儒忘年友善罔不樂其溫醇詩  
詞刻尚風骨擺脫輕靡陶鎔李杜汰滌清文既正體裁  
復減蹊徑可謂後來之高足惜乎天不假年進而未止  
學士覩其汗血可也諺曰瓊以蚤折白石截業豈不信  
然哉行書疎秀出塵頗得晉法贊曰

有美吉人溫其如玉既安孝友亦泯清濁揚芳詞苑先  
軌是程心遠節促靳其大成

陳幾亭先生像贊

陳素

此幾亭先生待漏圖也昔者偕陟春闈聯趨丹陛今二  
十年事矣茫茫日月終始可言獲對典型愜焉如昨贊  
曰蔚蔚豐鎬澗西瀝東北極雲翳星共攸同懷我哲人  
克秉惇庸溯源濂維正氣在躬措笏明廷堂階聿崇肅  
肅裳衣神明與通大用未極遺範無窮一髮千鈞欽茲

德容沐日浴月先生之風



明文海卷一百二十三

欽定四庫全書

集部

明文海卷一百二十四至七

詳校官編修臣錢樾

主事銜臣徐以坤覆勘

總校官庶吉士臣倉聖脉

校對官庶吉士臣吳裕德

謄錄監生臣徐彩

謄錄監生臣董熙

欽定四庫全書

明文海卷一百三十四

餘姚黃宗義編

銘一

義門銘

并序宋濂

天地之間有大防焉孝友之謂也水之始也濫觴爾苟無土以障之則必至於滔天火之初也熒燿爾苟非水以制之則必至於燎原人心感物而動不能無欲其端亦甚微不有孝友之人出為表式則淪胥以成風而彞倫斁矣昔先王有見

於斯雖委巷刺草之民能行之者必旌命之所以贊皇治章  
仁風而挽之於正也世之評唐史者且謂張公藝季如本劉  
君良孝行推於友睦數世不衰真豪傑之士嗚呼當是時金  
章紫綬之賢皂蓋朱轡之英布列中外未嘗無之顧以豪傑  
歸於閭巷之士者以其不俟教令所加而後奮也嗚呼南陔  
白華之詩蓋亦商之末世周之盛德也斯民以孝友著稱君子  
可以觀其世矣浦陽黃氏其先與文節公庭堅同所自出有  
諱度者宋隆興癸未進士亦諸祖也元至正中傳至諱珪君



生三子其二曰隆曰生隆生一子曰逢原生生二子曰逢吉曰逢昌逢吉兄弟亦各生子至十有餘人三世之間孝友無間言逢吉乃殫志竭慮設為教條既鏡諸樂石復遣從子宿請濂銘之嗚呼子壯而分婦姑反唇相稽秦之俗已然矣况去古日遠風氣日益漓黃氏能不染於末俗卓然不變其恒度豈非豪傑者耶浦陽以義居聞者二三人惟鄭綺之家已至十葉黃氏知感慕而興起進修益力焉知不綺若耶雖然許史之稱未足為貴也猗頓之貨未足為富也惟孝友積諸

躬令名昭於時其為貴且富也大矣所恃立兩間而無愧稽  
諸賢哲而有徵著之後世而可法何莫不由於斯黃氏孫曾  
可不思自勗或能如濬言揆之張公藝之流他日可馴致矣  
詩有之風雨如晦雞鳴不已濬於黃氏蓋深有望焉銘曰

浙河東疆地曰浦陽厥氏維黃雙井同枝科名陸離世  
服詩書有儒其冠以義為藩奕葉共殫視其齋庭左史  
右經踵武繩繩視其房除前絲後纒燈火與俱至和所  
形揖讓而升穆然無聲既行而飽實而匪夸三代一家

世道下趨子父割閨婦姑勃蹊十室九衰瀾倒波頽為  
天莫回蠅聲方冥忽聞怒霆孰不為驚植範建防翼法  
輔常斯德之元造端非難延裕惟艱任重於山如為高  
陵世益代增非人獨能如松之青故隕新承所以永貞  
方先與謀庶行之修其道曷由執敬為符夙夜究圖百  
世如初

菜蕒六器銘

唐肅

余子治圃越城南屋其中曰菜蕒架軒先生既銘之唐

肅復銘其器六以余子之治圃也其藝菜也必以鉏銘  
其鉏曰墾而植本斯立培而扈蕪斯茂衡深淺毋爾苟  
既藝其灌之也必以甕銘其甕曰泉之容伊德之充泉  
之吐伊澤之溥其揭勿羸其挈勿墮勿事乎桔槔之機  
既灌矣而草害焉薙之必以刃銘其刃曰惡草之滋資  
女以剪夷弗剪而夷則茅其蹊草去矣菜豐矣米之必  
以筐銘其筐曰掇其美女以下體斂其實勿滿而溢虛  
而受之乃其德左之右之慎爾執采而得之芼之必以

釜薦之必以盤銘其釜曰溉於斯烹於斯我有旨蓄甘  
如飴彼鼎食者殆而銘其盤曰脂弗我汚兮糴弗我慕  
兮惟味道之助兮銘已余子曰噫子善銘吾器切於物  
奧於理其足為吾儆乎請書之菜適以繼架軒之作於  
是乎書

周宁父丁學漢素温壺銘 并序童軒

周宁父丁學漢素温壺各一欵差鎮守雲南太監錢  
公素嗜珍玩愛其古雅購而得之乃徵銘於軒軒按款

高九寸九分深五寸二分口視深而減二分容四升八合兩耳三趾簡質無文者廼周宁父丁之罍也高七寸口徑一寸五分腹倍高而少縮光彩瑩潔色若流丹者廼漢素温之壺也是二器遠者不下二千餘年近者亦千數百歲或顯而彙進或晦而陸沉予不知其幾矣然其所以用不用者豈物自為之哉蓋必有使之以顯尼之以晦者也嗚呼士之處世何以異此是故耕莘者伊也保衡者亦伊也築傅巖者說也置左右者亦說也方其

辨茅築巖身執賤役何異物之見棄而自淪於銳斲瓦  
礫者乎及其保衡左右斯道大行又何異於器之見用  
而自同於殷彝周鼎者乎是知人之遇不遇物之用不  
用皆非已之所能為也雖然人之見遇者亦多矣使非  
其器安能必無其敗乎故器非鼎也祇見其折足而覆  
耳器非瓶也祇見其未繡而羸耳器非壘也祇見其餅  
罄而恥耳果足用乎故人之欲善其用者又不可以不  
利其器也或曰人奚物之比耶人之用大可以毗一人

康四海小可以修庶事共百職而其所藏之器所通之  
用豈直兩耳三趾方口圓腹之謂哉矧舊臣可任也壽  
者可謀也故傳曰人舊則習器舊則弊人異物之比耶  
予感其言竊惟舊臣壽者皆老成之人予不能無望於  
世之君子遂取二器之義以銘之其詞曰

有鼎之形靡折其足有罍之量匪朽其腹學分學分蓋  
有類乎養其大不累於小者其將求王明之受福者乎

右罍銘



瑩於外盎然以豐虛其中廓乎有容壺兮壺兮蓋有類乎體之大而用不窮者非所謂有始而有終者乎

右壺銘

居庸闕銘

有序劉定之

余觀自古帝王建極作都君制華裔維本於大德以膺天命結人心而未嘗不據依形勝以自固而謂扼天下之吭者也彼侯國所恃若齊穆陵闕楚武關小不之論而秦與西漢唐都雍周與東漢晉都洛乃宇

內大都會且傳世久遠統御廣際者然雍之險在函  
谷關洛之險在成臯關亦不過控臨中國而已唯我  
皇明定鼎冀方南向以御諸夏北眺以威邊界其介  
乎中外之關曰居庸實為覆載以內莫大要地謹按  
地志關在昌平西北四十里元翰林學士王輝謂始  
皇築長城居息庸徒於此故以名焉夫講求地理實  
蹟而勤述其義書生事也况茲關重險鉅防若前之  
云可不銘乎銘曰

帝承天命朔野是都坤奠其軸乾屹其樞長城為帶自  
天繚繞中聳雄關洞城裏表鐵壁鎔研玉峽嶕嶢俯壓  
博厚仰直矗層霄冠以雉堞守以虎旅屏翰中華販章土  
宇龍旗北伐鼓行其中如雷之震以出太空呼韓南來  
款塞其下如蟻叩閣以干天赦昔秦興役庸徒乃居宋  
失其防遼金長驅曷若皇明天所綏顧不創而因不嚴  
而固一夫當之萬夫莫前一世開之萬世其傳攬翠為  
書席崖作碣勒此銘章以貽無極

石鐘山銘

有序 楊守陳

彭蠡之口有山名石鐘尚矣後魏酈元以為下臨深潭  
微風鼓浪水石相搏響若洪鐘也而唐李渤非之謂如  
其說則瀕流庶峰皆可以膺斯名蓋潭際雙石叩而聆  
之南聲函胡北音清越是石鐘也而宋蘇軾非之謂石  
之鏗然有聲者所在皆是何獨此以鐘名蓋山下皆石  
穴微波入之聲嚕吟如鐘鼓中流大石空中多竅與風  
水吞吐有竅坎鏜豁之聲嘗觀察而得其實故是酈矣而

周必大又謂上鐘石高四尺下鐘石濶丈餘叩之皆響  
若鐘磬他石則否復是李馬余謂波間衆竅其豐山之  
自鳴者乎潭際雙石其宋左師之每擊者乎是皆可謂  
鐘也然瀕流庶峰其下響若鐘者蓋鮮石之高大而叩  
之函胡清越如兩鐘石者亦安得所在皆是且山之以  
物象名者若石鼓文筆之類亦豈必為天下獨然後名  
哉昉名山者其舟而察諸波間耶果履而叩諸潭際耶  
抑若大寧之山嘗有巨石狀如大鏞而今以已為波淪

之九鼎火焚之崑玉耶是皆不可知者事不目見耳聞而可臆斷其有無蘇之戒也前四人皆目見耳聞而言猶不能定於一余固不敢臆斷顧區區一山名何損於天下亦無足深辨者聞之故老我太祖高皇帝伐偽漢陳友諒時駐師湖口嘗登是山既而大捷友諒殪焉時羣敵惟友諒實彊難克肆勞六飛躬駕後戡四方皆指授將帥勢如破竹然則湖口之捷實天下之基也方登此時廟算先定聖謨孔神高陟遠覽之頃固已空七澤

而奄八荒矣。或山靈水伯變草木為甲兵，驅龍魚為  
蹕警，以張皇威，助聖武。耶凡山川獲一賢貴，登臨以名  
於世，皆可謂幸。而是山乃蒙玉趾，親臨龍顏，寵顧一岑，  
一壑。至今猶有輝耀，何幸尚焉。古之人睹河洛則思禹  
功，往在元季，微我高祖，民其殲矣。今四海內外百年之  
間，庶職恬逸，萬民乂和，雖羣動庶植，猶勝於亂世之烝  
黎者，皆高祖戡定輯寧之勞，而列聖紹述，煦嫗之澤也。  
凡登是山者，左顧彭蠡，右瞻金陵，江漢之心，其可已哉。

兵部正郎王尚忠嘗書於山之佛閣間屬余言故為之  
銘俾鏡諸崖石用告來者舍其細而懷其大云銘曰

楚有巨浸漫五百里曰鄱陽湖蓋古彭蠡陽鳥攸居禹  
貢肇紀其委之窮或扼其衝有山特起嵒嵒穹窿水經  
載之其名石鐘往在元季有梟橫厲江漢之間雲擾麻  
沸崇岡震驚汜可小愒天命聖武舟師徂征矛戟百萬  
颺馳霆鉤烈火西耀煌煌赤城敵衄而逋岨之湖口乃  
躋兩鐘以望九有鸞旗前登羽衛擁後猿麋羣迓魚騰



鳥將雲霞增耀木石焜煌天覽電矚已空荆湘玉輅方  
降捷音沸騰矢激酋殪厥衆角崩或者草木奮為甲兵  
四方羣敵茲迺惟劇一鼓殲之餘何庸力席卷萬邦拯  
其焚溺永康兆民澤垂萬世峻德穹勲惟天其至謂天蓋  
高曷足與儷山有巨石舊銘禹功苔蝕蘚剥有光流虹  
相古勲業亦銘鼎鐘於皇聖明式配神禹宜偕厥銘以  
耀終古厲我臣民無忘烈祖

韶石銘

并序王漸遠

惟皇舜既攝元位躬歷數受於文祖乃朝羣岳以釐庶  
政觀風於多方於是歲仲春二月東巡守於岱宗柴燔  
於名山大川以協天時以修人紀敦禮明政以憲於東  
后歲五月仲夏復南巡守於明都迄衡岳沿湖湘上陟  
九疑廼歷郴桂又其南抵於曲江之濱受覲於皇岡羣  
后羣牧畢會圭璧琮璜五瑞三帛侍於荒垆南蠻貢琛  
惟瑤琨象犀具皇舜廼矢文德舞韶於皇岡之陽鳳凰  
來儀百獸蹌蹌羣后荒服罔不丕格以遜皇舜曰都子

聞惟帝祗承明德不寶異物予其懋哉廼歸覲於羣牧  
歸貢於蠻荒之長三讓弗克委而去之廼陟方西惟皇  
既西羣后蠻荒亦各抵厥疆衆物棄於水湄粵古迄今  
遂成靈異天帝廼命祝融司護永奠厥荒以風於多邦  
某謂皇德廣運後之士庶罔或測識曰為韶石曰為香  
爐相傳以謠茲惟湮哉廼敬述其事而銘之其辭曰

洪荒之餘宣命之紀肇厥元聖中天而起維彼元聖德  
配彼天重華協光放勳是禪帝曰汝舜予奎於勤爾巽朕

位萬邦皇君厥位既攝廼陟羣后敷功蠻方聿至其至惟何格  
維皇寧止南荒嘉祉羣后敷功蠻方聿至其至惟何格  
茲文命維琛祗德克讓以敬維德維寶不珍異物蒼璧  
竒皇載堙以汨滇水溶溶皇岡惇惇億萬斯年維皇之  
宮靈涉自天百世之下錫我元元草木夭喬山川沖郁  
維皇之光行此遐福滇東小臣勒此蕪文昭皇之德以  
詔後人

書齋銘

并序歸有光

齋故市廛也恒市人居之鄰左右亦惟市人也前臨大衢衢之行又市人為多也挾策而居者自項脊生始無何同志者亦稍稍來集與項脊生居無中庭以衢為庭門半開過者側立凝視故與市人為買賣者孰舊地目不暇舉信足及門始覺而去已乃為藩籬表以修扉用息人影然耳邊聲闕然每至深夜坐者欲睡行者不止寧靜之趣得之目而又失之耳也項脊生曰余聞朱文公欲於羅浮山靜坐十年蓋昔之名人高士其學多得

之長山大谷之中人跡之所不至其氣清神凝而不亂也夫莽蒼之際小丘卷石古木數株花落水流令人神思爽然况天閉地藏神區鬼奧邪其亦不可謂無助也已然吳中名山西亘巨海東浸林屋洞庭類非人世皆可宿春遊者今遙望者幾年矣尚不得一至即今欲稍離市塵去之尋丈不可得者也蓋君子之學有不能屑屑於是者矣管寧與華歆讀書戶外有乘軒者歆就視之寧弗為顧狄梁公對俗吏不暇與偶語此三人者其

亦若今之居也而寧與歆之辨又在此而不在彼也項  
脊生曰書齋可以市廛市廛亦書齋也銘曰

深山大澤實產蛇龍哲人靜觀亦寧其宮余居于喧市  
肆紛那欲逃空虛地少天多日出事起萬衆憧憧形聲  
變幻時時不同蚊之聲雷蠅之聲雨無微不聞吾惡吾  
耳曷敢懷居學顏之志高堂靜居何與吾事彼美室者  
不美厥身或靜於外不靜於心余茲是懼惕焉靡寧左  
圖右書念念兢兢人心之精通於神聖何必羅浮能敬

斯靜魚龍萬恠海波自積火熱水濡深夜亦息能識鳶  
魚物物道真我無公朝安有市人是內非外為道為釋  
內外兩忘聖賢之極目之畏尖荆棘滿室厥恐惴惴危  
階是習余少好僻居如處女見人若驚禁不能語出應  
世事有如束縛所養若斯形穢心忸矧伊同胞舉目可  
惻藩籬已多去之何適皇風既邈淳風日漓誰任其責  
吾心孔悲人類不滿一瞬孰塗之人而非堯舜

丁氏半山亭銘

并序 李東陽



潛川丁君繼仁隱士也作亭於銅山之半名曰半山亭  
其子鴻臚序班銜乞予銘諸石縣之近區若槽山之奸  
雄治父之神恠龍湫之虛幻皆君子所不談麟山之風  
致亦未足深論彼半山者王荆公之故名也荆公爭謝  
公墩詩議者謂其習氣所發使其有知未必忘情於地  
下予為君識之以貽其後人使知茲亭為丁氏故物君  
之心非有所競而人亦莫得而競也銘曰

盧之潛川有山曰銅有亭厥中作者丁翁雙甍夾飛層

簷闕空繩平度均不下以上吐吞嵐霧凌薄蒼莽俯臨  
豁開仰抗高巖羣竒羅列萬象森朗連山逶迤如屏如牆  
長江重湖漾漾茫茫喬林長堤曲澗方塘晨暉夕陰往  
來其旁西望槽山魏武所駐姦雄一顧乾割坤據金卯  
訖錄旋為典午河山猶在俯仰千古歐冶遺山鳴金既  
躍張干雷邪光彩淪落幻術莫究九原不作僧有伏虎  
龍湫是於龍亡虎逝此事長吁亦有龍眠麟山故蹟丹  
青窈眇千載泉石山峙川流歲月若奔歸視吾山吾亭

固存我居我游我燕我殮終我齒髮貽我子孫昔有半  
山粵惟安石謝墩王寺名同代隔我來君去誰主誰客  
平生英氣所遇成敵終焉一歸誰失誰得今有半山若蹈  
陳迹彼豪有知此憾誰釋物各有主古人則云往者勿  
追來者有聞富貴難恃虛無莫陳不朽有圖惟德與文  
汝亭不歆汝山不磷我銘在茲垂千百春

讀易銘

并序楊爵

余既久在罪難中自念君子存仁造次顛沛未嘗少懈

歲月云邁百年易失頃刻光陰未可以若醉若夢而玩處之也即卧側障之以席盥手焚香凝神清慮讀易於其間客有謂予者曰其名此為安樂窩可乎余應之曰不然也余之罪多矣奚以安樂為哉人之處世非安樂則困辱二者而已世之人或以富貴為安樂以患難為困辱此固未然而謂吾之處困為安樂亦非也夫其所為憚于心而合乎義理之中正則雖日在患難此心未嘗不安樂也夫其所為愧於心而戾乎義理之中正則雖

日處富貴而此心未嘗不困辱也吾之所為質於古人之作用為何如其愧於四聖亦多矣然則名吾所處為困辱富可也又奚以安樂為哉况易之為書廣大悉備天地萬物之理具於此損益困節中孚習坎則切於處憂患之道也因銘以自警銘曰

安樂安樂由心之作輟轉困辱惟吾所速四聖垂訓炳炳簡編議之而後動擬之而後言或可以觀象玩辭而補吾之愆

約菴銘

并序顧璘

正德庚辰之歲璘來京師太僕少卿周君見於舍曰吾  
竊幸乎子來吾方有解於中未以語人請質之子始吾  
論學恥弗博也故統覽聖經汎涉羣言多識廣思唯恐  
或漏作為文章既被雲漢囊山岳且猶慊慊焉羞其鄙  
瑣今也多言而患馳苟有會焉兀兀終日而已始吾論  
才曰震奮為雄曠朗為特剴裁巨細弗見焚糶者斯天  
下之通才也古之人廣謀若平宏辨若誼吾甘執鞭其

門今也覩沉默淵密之士外木而中理動簡而節周有  
餘味矣服今吾取其素也味今吾取其薄也居室今吾  
取其適體也交際今吾取其不廢禮也推之百物靡不  
以約為尚乃築菴稱約志吾誓焉豈釋故即新有游於  
道階乎抑氣衰志頽將衰衰自居齷齪以苟終乎物有  
自蔽道有自疑故目不視面燭不輝跋明所弗逮也乃  
今願得承教於子於是璘乃正容起賀曰善哉先生之  
學乎所謂黜華掇實舍凡而執要者也按約之義為省

為束為要均道本焉是故太饗之玄尊大路之素帟省也服之用大帶射之用拾束也稽數以籌張網以綱要也匪省則華華則濫質匪束則散散則淫志匪要則泛泛則隳功故君子之學者也而後質固束焉而後志莊要焉而後功篤三者既修聖人之道具矣然則先生之務約也又何以加諸璘不佞無以復高明願修銘于菴以相厥志乃銘曰

道本一原物始太朴維皇建則貴順惡鑿澆風既澶繫緝



紛錯士尚彌荒靡所止託君子孔憂遡懷渾噩爰究道  
真統茲守約内存必專外動必確豈無多方匪我攸學

埋奴銘 有序郭子章

蜀之交川古氏羌地繇來遠矣其遐裔錯住洞島混  
跡漢蠻結羶毳以自蔽習精悍而健鬪其性然也明  
興經略西川招撫邊戎當事者以豺狼不可狎也歲  
捐金縉羈縻之然亦不敢負阻馮克以逞邇來蟻衆  
彌夥犬牙踰厲敝黻不度貪猥無饜隊西戎以剝行

道連北敵而騷居民至刈我堡長剗我邊人殘孽貫  
盈天人共怒時皇帝君天下歲之柔兆閭茂也大司  
馬徐公奉天討揭靈旗屬文臣材官而畫以方畧飲  
冰授節指日揚麾先庚而號令嚴肅未鼓而士卒譁  
鉦或攻或伐或圍或追勢如解籜事埒拉枯蠻且披  
靡莫知所嚮曳兵而實塹谷者自成京觀冒劔而赴  
江河者歛若斷流渠賊就擒碣房悉燬不半載而四  
十餘砦一掃無存故穴匪依餘黨深竄懼天戈之盡

劉悔偏頭之末從面縛軍門以乞降還銀錄而納款攪其首亂歃血埋奴以矢必不敢逆命司馬公乃奏凱班師西鄙之民始驟然解戈而即衽席矣露布以聞聖天子獨偉其功爵賞有差余同年謝彥實氏觀察威茂出入帷幄親履矢石嘗以其所睹記者紀西征事甚備因屬子章為銘鐫之石以彰一代頹膚且以示羌戎之後來者嗟乎漢當中興尚閉玉關謝西域唐丁盛際諸蕃僅質侍子未聞自縛首夷數十人

甘心幽土以堅誓盟自非靈威神武安能鎮壓其狼心  
建千古駿業哉赫矣壯乎洵為不朽敬綴其概而系之  
銘銘曰

芒芒天府坤維接畛綱以封艘綴以仁允狡馬彼獠滋  
蔓如稗勝乎梟獍殘於獬狁侵玩不黷酷茲邊疚事聞  
當宁帝赫斯怒授大司馬珣戈以捕爰摩文韜廣擬武  
庫猗將操盾謀臣獻謨鼓鬣震天輶輻塞路蹴嶽拔山  
掣電卷霧虵豕陵亂狼狽而哮曷矯其鷙曷馮其固執

壓宮廬機駭槃瓠追奔逐北俘馘滿野餘孽窮屈悔負  
咻噢願罷金縉以謝西征稽顙植額顙天丐生詎曰駢  
旄縛而乞盟瘞之邊土僂彼不庭五兵既隱七宿尊衡  
啓陸之疆篤國之禎功序廟廊茂賞殊旌在昔嚴帥劍  
閣勒銘矧茲偉煜豈直蠻平異哉京觀自剝鯢鯨刻石  
山阿千載威名

磻村石硯銘

錢允治

吳西界三十里有村名磻亦曰硯石之山上為吳王之

故宮其石也村中人取以為猪之欄糞之窖等於瓦甃  
城中人取以為牆之趾階之級稍為尊崇而為硯者千  
不得一也羅紋鸚鵡金星玉帶富貴者得而狎之貧賤  
者莫得而庸焉乃鄙人取礮材之中硯者付之良工琢  
而為之不古不今可異可同高其外虛其中實而不偏  
深而有容於以吮筆濡毫其大徑丈其小徑尺或為雲  
虹夭矯長空或為游絲披拂清風可以發越吾之鬱勃  
可以輸寫吾之心胸其德靡改其壽無窮噫嘻茲石也

非玉也詎曰比德乎帝鴻

彭祖觀井銘

孟思

維古人中名善養生於我老彭獲壽極永靡物不警尤  
謹觀井覆井車輪絙樹縈身扶杖蹲蹲乃敢少前俛視  
惕然猶恐墜旃意若孱孱苟能效焉維以永年予曰不  
爾怵怵蔥蔥非養身旨拘若凍蠅氣拂厥膺必夕飲冰  
跼蹐以臨蹢躅滯淫爽傷厥心即有井幹匪列泉寒苟  
或以看損目傷肝兢然若墜是為過懼懼過膽傷脉絡

不注榮殘衛單交相為瘡養生如彭四體不諭我養生  
術術簡弗難非吐而納不藥而丹弗輪弗繩去杖而安  
既不隕越亦不蹢跚厥術云何有井勿觀

明文海卷一百二十四



欽定四庫全書

明文海卷一百二十五

餘姚黃宗義編

箴一

三箴

祝允明

余以禍福非聖哲所趨避然有自召之者蓋亦有機  
矣士之機多由三者心舌筆也因各為之箴

心

倏然而人智賢聖神而與天地均非斯曷存忽然而物女

宄盜賊而作萬物騰非斯曷出人用斯殺我我亦用斯殺人  
以逮其身人不可察而我可戒戒之哉戒之哉禍福曰心

舌

倏然而譽仁賢知儒而游揚誕乎非斯曷居忽然而毀暴  
慢倍鄙而憎遠罪棄非斯曷起後用斯殺予予亦用斯殺後  
以偕其孽義不可察而予可戒戒之哉戒之哉禍福曰舌

筆

倏然而褒華衮立朝而炙竹耿昭非斯曷操忽然而貶象

服黥臉而流汗刀簡非斯曷典物用斯殺已已亦用斯殺物以  
并其譎物不可察而已可戒戒之哉戒之哉禍福曰筆

還心箴

鄒守愚

余性癡也日余酬酢出於余心以協天則而不余愧  
或嗤余竟不顧憚叙不喜顛躓不懟然亦不余留也  
其或不然而奪於愛物不能制持余顧憤悖交戰戰  
不止寢不帖寐食不甘嗜坐不暖几行不寘履前噤  
後呵森列余前乃自唾曰汝胡為乎然以形累汝隳

平生耶於是乃憤然以劄之曰還汝還汝母為余妖  
雖忤於人無惜已乃怡怡然于于然譬諸霧開冰釋  
如於其初於是作還心箴

汝動於義汝心則遂汝不動於義汝心則悸汝母問其  
他曰惟汝帥景星慶雲維其瑞矣魍魎魑魅惟其類矣  
上帝臨汝勿云貳矣

讀書左箴

丁自申

讀四方書如陟四方之顛讀萬古書如游萬古之前耳

不聞諠囂之聲若與聖賢相問對身不設暴慢之氣若與  
父師相周旋噫余何可一日不讀書兮蓋將有味乎斯  
言

讀書右箴

耳讀書而聰目讀書而明心讀書而一神讀書而清疑  
讀書而辨慮讀書而瑩饑讀書而飽困讀書而醒愠讀  
書而喜忿讀書而平噫余白首未聞道兮惟讀書以畢  
此生

明文海卷一百二十五

欽定四庫全書

明文海卷一百二十六

餘姚黃宗義編

戒一

三戒 趙搗謙

昔柳子厚作麋驢鼠三戒蘇子瞻愛其辭乃以河豚  
以下三者擬之其風戒之意切矣近有觸於余懷者  
頗類乎是故亦作三篇於其左

灘之龜

余舍濱溪上石晶晶然延袤數十畝間而新霽有龜出  
暴於石牧兒適有見者蹶步執之號於衆曰吾得龜矣從  
衆往趨視之戲玩百狀有欲視其首者龜堅縮不出戲祝  
曰龜乎龜乎能出首以視予乎頃復不出乃相謀以綫棘  
搵之搵其尾則首出搵其首則尾出兒乃大笑曰以善道  
求汝則首不出以惡法侮汝則首尾俱應尚為知所從耶  
吾以汝能先吉凶以告人而不能先吉凶以免已尚為知  
者耶羣兒皆挪揄大笑余聞之亦含笑而歸援筆識之



穿山甲

甲蟲有穿山其名者善負山而出故名性嗜蟻於羣聚處輒開其甲佯死於地蟻入甲罅啞啞然如得珍物俟其至衆則固斂其甲入水甲張浮蜃水上徐以口拾之日食皆然一日遇人於山谷間人以沙礫擲之則卷然作束如石狀以紿人人見其紿也因持以歸鬻其肉而食之甚旨以其甲能已風疾復貸於藥肆吁穿山謀食之計亦巧矣何其巧於取蟻而拙於避人也哉卒至肉鬻甲折之患悲夫

水之鵲

鵲一名翡翠體雖小其毛羽青瑩輝彩可玩常循飛水厓入水底取魚蝦水族食之巧者利其毛羽以一囚飛舞水上媒而執之取其羽市於富貴家為女子飾直視金玉因致富夫負毛羽之美而不能循幽藏僻乃栩然終日競誘於人至於斷取而終不悟哀哉雖然世以羽毛夸於人者豈獨一鵲與

車戒

蔡潮

逸休先生居洛下八十年未嘗一日不讀書潛心聖學

灼然燭事理恒計人禍福於幾先固或不應驗人以為  
通神嘗閑行郊外遇有商販虞孚者厚其載以貨於洛  
日且昃違城市尚舍許懷促急趨意倉皇不循軌轍問  
蚤暮之節於先生答曰宜調爾轡舒爾御範爾馳驅雖  
暮尚可到亟則不能也孚怒目抵憤謂先生迂且誑策  
策甚急兼步疾驅雷歘而颺旋矢激而霆迅揚揚然拊  
軾呼噪飛塵蔽天日茫乎若憑虛而莫知所指未數里  
側越峻歧左凹右凸謹聲聞遠社而車覆矣輪傾輻敗

蓋折軫虧貨毀壓過半震愕噉號僅以身脫輯理漸向  
冥竟止於郊外謁拜先生寓所願聞先知之故答曰吾  
非識緯術數之學洞觀古今據理審勢而必然也不聞  
孔子云欲速則不達見小利則大事不成吾豈教汝以  
緩不及事哉昔晉陽處父以剛愎敗乃事鄭子陽以迫  
隘災其身前車之覆後車之戒也能如西門豹佩韋以  
自緩董安于佩弦以自勵均其緩急使之調和何以至  
此極乎愧謝而去雖悔無及矣靖州馮生鑿發跡轅門

初授天台令其於禍福之機軸倚伏之途轍領受予門  
舊矣因其請教之勤述往事作車戒貽之

五誠 張純

越有女桑氏年十六而寡誓不改節高垣墉辨內外雖  
童子不得見盛年遷於逸慾旁室有美男子聲音相悅  
私握地而通焉每至旦貞操又凜若蓬鬢垢面哭泣不  
絕皆曰楚之貞姬也縣尹上其事於朝以旌之未報女  
桑氏則姪身就館矣且曰予思苦而腹疾也或令其家

求醫診脉曰男女不相漬死固吾所也何求於生鄉人益賢之數月呱呱而生子噫鐘聲自宮鶴聞於天本之先蹶枝葉從之魚之在淵欲蓋而章孰謂微之不顯而令名可以倖取哉女桑氏早知戒焉吾知不必傳笑於世也

余讀書於瑤山下忽有人告余曰是巔有白人洞草木叢幽鬼神焉司之樵牧者必墜死怠於祭祀則稼穡不能登每聞有訶斥聲余曰有是哉是歲五月五日之夜

分風淒雨黑見流火星然散而一二而什伯也其光燭  
天復合於一俄上俄下守舍者不敢指曰虎豹棲止暮  
夜何之人乎非也吾知洞君遊也余亦不能辨閉戶歎  
息而已詰旦閱其所有人跡焉蓋某人舉族求其牛羊  
也夫訛言先入繼眩於目見苟非叅驗之固焉誰其以  
理觀乎詩曰人之為言苟亦無然此之謂也

吳人客於楚八年而歸道宿於山舍見一美女無父母  
兄弟為作飲食設衾禪心悅之結為夫婦未曙負而逃

焉其友問其故具答之曰是謂非望之福也必有奇禍  
蓋為爾卜諸卜曰狐也不聽其妻知之日夜泣不止曰  
是恐割吾愛也妒婦人也遂出之期年形體羸弱語言  
訛亂或為召巫師燃鹿角而照之狐立於牀下始矍然  
而悟遂召其友與故妻也再拜而謝焉滄江道人曰取  
諸外妖而為祥不信其內親而為仇今之人皆然妄也  
是故惟仁者能愛人能惡人

余行括之深山中見一翁顏色如童子坐一石室余異



而問之曰皇都北徙老夫居此余曰何術而壽何老而幼也曰余兄業商賈北走湖南窮百粵以巧射利珠玉逼楹手足不停先余而死九十年二弟佞不能辨奸不能眩好文辭日事筆硯識利害是非瑣瑣而計析之不倦先予而死百有十年余長而愚妻子曰咨遂不室廬風雨霧雪言蔽其樗朝陽明月抱犢于于起卧無常黃精為糧曰春與夏花明草叢落葉飛鴻乃知秋冬憂不至我樂不知終言訖而去嘯於長松翁蓋有道者也余

思結髮記誦逶迤盛年窮通好醜其中乃遷玄鬢種種  
顏色不妍攬鏡自照為之茫然自今而後須命於天如  
木如石謹識斯言

吾鄉有鄭學究者陰為不善妻子詬詈如傭丐出而教  
小兒莪而冠衣裳楚楚束帶而佩玉勃然而顏色如神  
命出則唯唯奉行不敢慢有惡之者給其子弟曰爾師  
平素如是如是謹效之弗受責也兒輩信之凡聲音舉  
動悉夫人所云也鄭覺焉甚愧不越月而去之噫今之

為民上者反所好而令不自度而作威百姓之化于惡  
德能無愧乎故曰善為人者能自為者也善治人者能  
自治者也

明文海卷一百二十六

欽定四庫全書

明文海卷一百二十七

餘姚黃宗義編

解一

琴釋

胡翰

媯仲子學琴於東峴之叟三日而鈎絃七日而成章不習者踰月而幾於忘矣客有造者曰大夫無故不徹縣士無故不徹琴瑟吾見仲子之琴徹矣亦有故乎仲子曰無故也吾聞清角者天子之琴也號鐘者諸侯之琴也

皆古之制也未之能詳焉吾嘗以今之琴攬而醜之揆之於古其制有曰八尺六寸正度者有曰七尺二寸者又有法四時五行長四尺五寸者又有象三百六旬有六日為晷之數者代有不同孰從而準之五絃宮商角徵羽大絃寬而溫小絃清廉而不亂故宮為首商次之角又次之徵羽又次之未有以宮居中央商張右旁小大相次不失其序如漢儒所傳者習而不察孰從而正之五絃之外為少宮文王所加也少宮之外為少商武

王所加也未有為文王操能去武聲不以少商應大絃如唐人所論者此又弗察也謂之變音可也音止為五加二為七蔡邕益之為九絃孫登損之為一絃由一衍之為二儀由十倍之為二十者有之以為好事者之過而二十七絃之離周已具矣此別出變音也故名曰變後世迭為損益蓋不知其非正也漢去古近史遷所載當時之制豈不由周人之舊乎桓譚蔡邕可謂好古矣未聞有取於遷也歷數百年而至唐楊收奮其獨見之言

以折安浼生之徒而在邕亦未之有及也以史遷桓譚  
蔡邕楊収之博物通類猶不能正之後世孰取法焉况  
聲音之別有經有緯有從其製有暢有操有引有吟有  
弄其妙窮本極幽得之心者不可喻以言得之手者不  
可傳以譜得之天者人不與力焉求其如成連師曠師  
襄師文者益又遠矣天地之間形氣相軋而聲生焉今  
夫高厓巨壑泉源所出淙然而鳴沛然而決澎湃沓沓  
放乎江河之間澌乎春容而自得其遇大礮批大窾



怒而相射回旋相薄大者砰然小者硜然聽不可極若  
若神物憑之莫測此非水石之聲也即鴻蒙廣莫之野  
噫氣鼓之或穆而清或淒而厲八方蕩摩其變也噦然  
外陰閉而內陽欲出二氣未分若與敵遇轟然動乎九  
地輻而磕磕颯然而天雨此非風霆之聲也即奮至德  
之光合生氣之序剛而不怒柔而不懾擘緩而不肆幽  
深而不怨不播不石不噍不殺不憇懣其情深其文明  
其氣也盛其化也神洋洋颯颯乎非風非霆非水非石

此何聲也惡得而寫諸客竦而聽俯而作卑陋而退

邃菴解

李東陽

邃菴主人通籍禁廬僑居京第隙地晨掃重扉晝閉客  
有過者叩門而問曰此非揚子之居乎童子對曰是也  
導客而入若引若曳復院繚垣巍堂巨櫺客乃躡足脫  
屨探懷出刺將修容以為禮且厯階而就次童子曰未  
也再導而前委蛇隱翳突雷中啓懸櫳外蔽客乃髣髴  
指擬逡巡睥睨耳側聽而無聞步將舒而復跂童子曰

未也盡歷紆曲豁達蒙矐仄徑旁通曾軒倒綴棊几庭  
設牙籤架度主人方兀坐書堆凝神注思聆磬歎而偃  
起具冠裳而出俟客乃揖而請曰子何居之邃耶主人  
曰從善實難從惡則易地有所宜擇俗有所宜辟吾將  
寄遠心於車馬託大隱於城市屏物誘於紛華去塵襟  
於袞襖期深造以獨得匪超舉而長逝客曰如斯而已  
乎主人曰六籍絲琴諸家鼎沸衆難交錯羣疑積滯吾  
將辨亥豕於偏旁註蟲魚於疏記思縷析而毫分庶窮

按而絕繼豈塊處而無營亦嬰心於有事客曰如斯而已乎主人曰理窟淵微天機奧秘尼叟之所罕言庖犧之不盡意吾將高仰堅鑽深鈎遠致求四情於未發之時探五性於有生之際繇粗而益極其精舉大而不遺其細尋墜緒於唐虞溯長源於洙泗窺數仞之宮牆涉千尋之涯涘會萬變以同歸或殊途而一揆顧茲菴之攸寄若百工之在肆彼居安以資深亦引伸而觸類者也客起再拜領邃之義識道理之鄉方得工夫之次第

若馳康莊請執君轡若游大川請鼓君柁隨君所之無  
畫無廢鉅卷長辭高楣大字晞唐學解擬漢賓戲匪菴  
則名敢告同志

香灰解

楊爵

予復下獄半載為丙午年三月初七日晨旦東廠使邏  
者來覘即予卧側以殘瓢藉囚板上相與偶坐者久之  
獄中穢氣鬱蒸久在內者習不自知從外乍進則臭不  
可堪乃以棒香一莖挿坐前瓢縫中焚之須臾香盡灰

不散宛如一完香馬予取而懸諸壁上至第五日猶不散因思其故為作解以散之夫是物也其將中抱憾積憤凝滯於此而有不釋然即抑焚猶未焚而托此以為永久耶二者雖有間焉而其精誠感致則一也遭世乖變人定勝天即一物之微而其用之所措固有幸有不幸焉耳蓋賓筵廣設幄錦幃羅庖翟薦德恪舉殊儀五和音哦上肅環冕下列笙歌君臣交慶委佩鳴珂旅語之際嘉謀孔多聞善即聽若決江河王猷下降枯槁滂沱

雍容揖遜永息干戈上安下順宇內冲和則唐虞三代  
之境界也燒異薰以昭明德固已有之舍彼其處而來焚  
吾獄中焉此何等氣象也瑾櫬掩戶日影不通塵留負  
鼠隙引汚風一息淹淹百慮忡忡其與吾環列而偕坐  
者不過三五囚徒東西南北偶此相逢或十三四齡口  
尚乳臭之豎子或八九十歲鬚眉皓然之老翁身披帶  
索首冒飛蓬額感氣喪肌削腸空縱蓄百金一動即窮  
荷校滅耳罪彼不聰手梏足械膿白血紅俯就坎窞仰

叫穹窿使聞之者皺眉見之者戚恫甚至於不能為心  
則閉目掩耳佯為瞽聵爾來焚此可謂擇地擇人之未  
審忽於所入而謬於所從者矣久而不化疑有神明類  
彼志士之死不瞑嗚呼其劉忠愍耶抑周蹟山浦竹塘  
耶不死正寢死此福堂名垂不朽同彼霄壤與我國家  
為龍為光雖然陵谷有時而變遷金石亦至於消泐故凡  
合氣成質寓形宇內而為人為物者終歸於盡天地如  
此其大也古今如此其遠也其孰不蕩為灰塵而揚為



飄風乎爾其欲外消息盈虛之常道觀反復無窮之世  
變以後天而終乎是固無此理也吾為爾摩散之再拜  
而祝之曰匪人焚爾惟爾自焚爾不馨香與物常存燬  
以烈火騰為烟盪上而不下聚而不分直衝霄漢變為  
奇雲餘香不斷苾苾芬芬龍逢比干相與為羣爾宜自  
慊胡為云云理無二致吾以喻人事苟可死何憚殺身  
願爾速化歸彼蒼旻樂天委運還爾之真拜起悽愴雙  
淚盈襟嗚呼易化者一時之形難化者萬世之心形化

而心終不化吾其何時焉與爾乎得一相尋也

許白雲求誌解

張寧

虞文靖公不肯銘白雲許先生之墓以書幣復張率性轉致其門人門人於先生猶父子以父事於人而為人所阻未有不怒者庸暇計其可否哉無怪許氏門人之致辨也王餘慶聯往復書為一通識其末曰世固有越世而相感並世而不相知者詩書文章天下所共知人品氣節亦天下所共知是惡用以口舌辨敬書以見古

今士俗隆汙其言意正平和婉不激不露度越同門遠甚後之觀者止可致感歎於存歿之際敢以為身之戒勉不宜巧排力辯為死者定枉直於不可致詰之鄉而加之意非侍於君子之道也公書中語於先生固已尊待之至若其論列為銘非知之盡則無以詔天下而信後世意即東萊所謂待人不得不寬論人不得不盡者或遽以此議公昧於知人公於先生言極尊待豈得不知所不知者特以行狀多未諭終莫能得其學行道德

之詳而難於序述耳豈可與蘇東坡不肯奉詔作苑公埋銘者例論哉寧三復莊誦因文靖公書見古人為文之不苟因王餘慶諸門人之書見古人師弟子恩義之篤餘不敢知也是卷流落人間楮墨如故而今為彥章都閫所得可以托不朽矣予見卷中題識者無不致疑於彼此之間敬為之解

寫騷亭釋

張弼

淮陽子為秋官郎以寫騷名亭有非之者曰屈原之離

騷其何時乎使非楚襄懷之世恐弗作也子當成康之  
治而寫騷殆所謂不病而呻吟乎能無背時乎淮陽笑  
不答其弟子吳之珍以告夏官郎東海居士居士粲然  
而起曰汝知春秋乎春秋叔世之書也亂臣賊子之事  
也孔子不得已而著此刑書宜治世之弗之用也漢之  
盛時儒先君子嘗治之乎曰治唐之盛時儒先君子嘗  
講之乎曰講宋之盛時儒先君子嘗究之乎曰究使在  
堯舜之世必將併絕之乎之珍默然意若有弗懌者居

士曰吾方患世之陋儒俗子謂孔子道之以政齊之以刑為五伯之事未知堯舜之治亦用政刑乎曰此猶天地之四時有春無秋何以成萬物曰然則堯舜既不可無刑政則春秋在堯舜時亦必不廢也曰諾曰亦有廢之者乎曰有曰誰曰王安石也安石之流嘗鄙棄春秋謂斷爛朝報矣曰其究云何曰塗炭華夏招徠邊釁播遷王室陸沈神州遂至亂臣接踵怙勢擅權而宋祚因以淪亡實肇自春秋之毀也居士撫几曰噫亂世之春

秋乃治世之膏粱不可毀者如是夫則離騷之在治世當毀之乎離騷固非春秋比倫也忠君愛國之心九死不變則春秋之所必與也敢問盛治之世懷忠君愛國之心者將在所斥遠乎加獎也朱子所以雖扶病必詳釋之也處方今盛時而寫騷可乎不可乎其志忠乎佞乎其行潔乎污乎必有能辨之者然而必不逮彼捧溺嘗惡之流華爵秩盛輿馬飽妻子志得意滿而誇詡里氓市童矣此流若有諂書汲汲然以攻之亦不暇寫也

之珍乃悚然拜曰敬以告吾師遂書以為寫騷釋

立愛解

蔡羽

或問立後大義也夫道一而已法有二原何哉外史氏曰何謂二客曰律所以取平也息爭也吏之案斷曰生則從心所愛死則昭穆相當竊疑之若二原然外史氏曰余見其一未見其二也立後之人一也云生者謂其已定於生前也云死者謂其生時未有所屬擬立於身後也夫父子祖孫託於久遠非其素所愛則不可非愛



則隙生矣甚或相嫉相亂至不可言矣隙生嫉且亂是  
讐也可以延其枝乎故立後莫大於立愛律家曰生則  
從心所愛聖人原情之論也其曰死則昭穆相當者生  
時不暇為逡巡乎身後衆求立之為奉其祀是時父祖  
考妣已亡無從詢其愛否但據昭穆立之則疏不得間  
親幼不得越長亦原情以息爭也翰林院孔目蔡羽九  
達先有子名震哥早亡九達年逮五旬思立嗣無親兄弟  
之子求諸從兄弟之子昔多違碍紛紛非余愛也惟翫

弟之季子師少素愛遂援立之更名學禮後為之冠且娶生一孫不久死連生二女孫時外史氏年逾六十將宦遊京師自顧鬢髮遠適他方無以自壯念震哥之慧而札學禮年三十未有子顧箕裘奚屬哉於是又求諸從孫之中有傳姪之子敏行可愛遂立為孫改名延蓀為之聘矣將行冠矣使學禮而無子固其子也使天憫學禮幸而有男則震哥之靈悠悠恒軫余懷若因延蓀而引其緒無損於學禮也况二子二孫亦何嫌哉嘉靖

十七年歲戊戌外史氏從南京翰林院考滿還思勉學  
禮以耕延蓀以學聊為各委其業而資養之母令荒廢  
均思其職因解立愛之義豫用曉之請諸名人圖咏為  
二卷子孫謹守焉

三不幸解

李濂

伊川先生曰人有三不幸少年登高科一不幸席父兄  
之勢為美官二不幸有高才能文章三不幸敢問斯言  
何謂也曰古人為學之道以明明德為本己之明德既

明而後可以新民故子夏曰學而優則仕季路使子羔  
為費宰而孔子以為賊夫人之子也蓋凡人少年登高  
科必無深蓄厚養之學練達精明之識志滿意得輕佻  
浮薄其能致遠者鮮矣席父兄之勢為美官多挾貴恃  
權弗自檢飭行已則乖臨事則眩其能自立者鮮矣斯  
二者皆未能明乎脩己治人之術或有任情妄作並保  
終之為難謂之不幸誠哉其不幸也至於有高才能文  
章則其氣必揚凌忽長者傲慢同列自以為辭藻超異

人莫我及必不肯俛首求益虚心下問以探討義  
理之精微其於治心養氣之功不復知所用力縱  
使成名亦不過為文人詞客而已豈非人之不幸  
耶胡仁仲有言今之儒者移學文藝干仕進之心  
以收其放心而美其身何古人之不相及哉旨哉  
斯言實與伊川之言相表裏嗟乎當今之世父兄  
之所訓督師友之所講授惟舉業文章而已宗族  
之所期望鄉黨之所欣羨惟科第官職而已苟能

有是皆以為家之令子里之奇士抑豈知科第文章而外有聖賢之正學乎風俗至此良可慨歎故嘗為之說曰少年登高科則快意於進取必萌侈大之心何有乎謙虛勉進之功席父兄之勢為美官則溺志於逸樂必致敗亡之禍何有乎畏慎持盈之道有高才能文章則騁技於枝葉必棄根本之實何有乎沉潛為己之學伊川以是三者謂之不幸其憂深其慮遠其為天下後世人才計至警

切矣顧習俗之移人雖資稟淑厚者亦必逞其英  
雋亟于功利弗能自脫然則人才之不古若有由  
然哉

呷酒解 莫如忠

余昔遊關中時問酒之名則惟桑落為最著至是客  
有自關中來者以呷酒餽余曰亦關中名品也余嘗  
而甘之何論桑落而後悔其過之晚也呷之義以飲  
名可無煩盃斝獨卓管甕中喻而取之時其耗挹水

注馬以度羸縮水漬成酒機相灌輸飲罄而貯常盈  
舉數而序不亂津津乎若玄蟬之吸露而無損於廉  
偃鼠飲河各充其量也不洵為酒德頌哉余喜止客  
及所與偕來者凡為大賓三初筵既竣斯釀乃陳客殊  
饜之命爵無算時則陪儂者或不任爵儼然啣余而  
讐曰子實擇禮大賓在是匪觴之稱而呷之褻無乃  
不可乎余曰唯唯否否如子之云則蠟趨鞠脰盤辟  
雅拜而以為容者余非不知也然酒客之既也而



敢弗供母乃使容謂余已曰無褻而實褻之貺乎大禮  
有初古汙樽而抔飲非賓禮之初即禮則不愆奚飲之  
擇傳曰苟有明信潢汙行潦可薦於神明可羞於王公  
而况君子合賓主之交享用玄酒以佐大烹質而有文  
非不廢禮明信孰甚焉而云不可何也於是陪儷者起  
謝曰我過矣我過矣我乃不知亡於禮者之為禮也微  
子詔之余惡覩夫大方以負鼎非聖飲瓢毀賢之惑終  
矣再拜避席而退賓飲如初

鳴楸解 屠應峻

齊郡黃君德兆仕於朝退耕於海野居數年太宰舉其  
才徵還郎中道莒城止客舍庭中空夜聞聲焉聲之所  
起如風颺颺迤颺羣卉枝柯相樛飄舉升降涓泉若流  
砉然勃鬱激逸較輻疾浪汨沒駭騎奔騰綿延抑歷翕協  
誼缺迭盛更微若諧若怒恍惚靈變幽暮遘迂究若有  
端視不見所邑大夫晨馳而告曰是之謂楸鳴者也楸  
植於舍且數百歲矣曠世一鳴聲聞惶惶土人志之曰

維禎祥理或晰而莫析事有微而必彰陳寶鷁而節來  
室木蕨而蹶張鶴鳴陰而爵縻鳳止岐而德昌宜哲民  
則以興業典冊煜而垂光也海野子來以告少微生曰  
吁有是哉運化莫齊氣感斯激應月而潮矢風而疾龍  
矯雲翊電迅霆擊予覲夫物之感於聲也清商奏夏木  
零處女嘆巍城震彤昵豐鼎雉升宮鐘應銅山傾風出  
囊而應嘯獸仰秣而翔廷石何憾而質隕水何憾而淵  
騰虛管協候空谷授音固無心以類致亦頑冥而兆靈

吾請語子以楸鳴之徵可乎夫人之為精也撫英韞靈  
委端於天體則軌曜智越垓埏故能淪格晦邃徹歷幽  
玄昘嚮變動微入無緣也王者循民辨政鳩虔治官裁  
紛釋憾匡奠以安皇皇羣辟掌之宰史明掄周虞登賢  
斥鄙百度齊均四海咸乂子實哲良宅揆繩馭乃今服  
休米列豕貳輩者抑皆緝緝濟濟視民若子競競繹繹  
位暨於理哉其或躡蹤恢詭秉志獷狂殫民厚殖背道  
自藏仇若秦越刈若莠稂急若束濕薪剽若振萎黃令

鶴伏穀牧羊以狼上下弗恤隕越為昌於是羣黎畢逋  
額天自辜大東興謠鴻雁矢歌舛易陰陽互睽天和斯  
楸之鳴恍與為徒也亦有憑憑俊乂屹屹榦楨荒遜在  
野播遺弗賓容瘁楚澤名淹衡門藿藜弗給山澤長辛  
圭璧膚玷駢駟棄樞窮微終遷沒身永謫南冠伏纍圜  
轅執戟天生若才用之不卒則亦戚慄屏怍情營氣蒸  
俯觸草木眴通神明淵默瞑聽寄之斯鳴子方作凝丞  
弼後先踐斗樞提衡銓迸黜蠹吏平章化元植登曠哲

甄崇逸賢景風四協穆氣不奸神之聽之福祿來延名  
勒洪鼎功被朱絃嗣卷阿於國雅張廣樂於鈞天斯固  
感楸鳴於茲夕信禎祥之不愆也

雷解

屠應峻

己亥秋七月朔雷擊奉先殿古室是夕鼓樓災宗伯右  
諫議請明黜大僚以勅天戒於是司寇屠公僑南宗伯  
呂公楠請罷詔可僉戚戚心異之以為黜之弗若也史  
某氏解之曰吁夫天之赫怒以威也為雷為霆陰薄陽

摧隱麟若巡駟訇若追颺揚電矯虢虢虺虺磅礚鬱律  
礫薄迅越千轂駢擊萬礮虺伐駭氣漂奔殺機闕發當  
是時也丘崩嶽遷魑潰魍蹶凶人喪危儻忽亡魄窮暴  
失勇蒙卓喪力子婁罔施其精夸娥莫措其疾行若負  
刃庾安得穴身鈔定舉面鮮恒色及究其所摧滅也僥  
倖得免邂逅時脫疇惠迪而抵擁或輾掇而罔慝不滔之  
命罔渝之理亦過而已矣乃或嶢華搥癘其石虬木摧  
折其枝故宮焚蕘雋宇壞栢釋此糾彼其故何與天道

恢恢當威見值逢衝則樞過披則入固非斤斤以晰微  
織織若飾職也將嚙噬慘嚙赦毒所觸隱若虺蜴云爾  
哉今夫萬乘之怒九重之威矍矍赫赫亦猶霆雷也劉  
然廣運逆意則誅珉瑜在御當者為竒呈脫函車之獸  
網漏吞舟之魚故愛之加膝憎之苴履惡之成屋跌好  
之生翮羽慘燠為冬春進退異虎鼠崇之則跨騰青雲  
之上抑之則委墮黃泉之下朝握夕擯安論潔污猶之  
雨露所潤日月所臨函氣者育失化者零豈云荃蕭之



貴賤騶駢之美惡鸛鷺之鷙與仁哉雖然天不可慮道  
不可幾仕無常遇士有恒持嶢華不以顛石損其形虬  
木不以折枝毀其幹君子不以罹阨決其維是以三閭  
九遷而未悔孫叔旅進而弗愉展季抗迹於三公姬旦  
孫德於碩膚豈其情之爾殊哉固以義為不可離也故  
齊得齊失達人之極融融娛娛味道之腴遺物定志奇  
德之止改玉改裳不改其行至人恬漠與道翱翔損華  
宅實時暗久彰斯非美乎且聞之舉世同好矚然莫渝

慎修可願神聽不怵火齊彌光乎莫眊大屈厲質乎重  
銷隋阿別利於糾紛新栢辨節於後凋衆庶憑朽乎株  
木賢哲蜚聲於寥寥二先生者獨行不懼遯世不幽覽  
輝千仞德音矯矯詩曰潛雖伏矣亦孔之昭其斯之謂  
與至若堅磷於砥絲涅而緇鏤剛以折荃化為萑違則  
去窮易執射時則固二先生之所譏亦非僕之所敢知  
也

明文海卷一百二十七